

Tge munta il plan d'instrucziun 21 per il Grischun?

Deputada Elita Florin-Caluori (pcd Razén) vul savair tge ch'il plan d'instrucziun 21 munta per il Grischun

DA MARTIN CABALZAR

■ **Actualmain sa chatta il plan d'instrucziun 21 che è vegnì elavurà dals directurs d'educaziun da 21 chantuns tudestgs u plurilinges da la Svizra en consultaziun. Damai che quel duai er esser liant per las scolas grischunas pretenda il cussegl grond d'era pudair dir in pled en il chapitel.** En vista a l'impurtanza da quest document per la scola grischuna vul deputada *Elita Florin-Caluori* (pcd Razén) – sustegnida da 49 consignonts – obligar la regenza d'infurmar il cussegl grond en ina furma adattada davart quest project. Il parlament chantunal duai plinavart er avair la pussaivladad da prender posiziun ad uras ed a temp davart il plan d'instrucziun 2021.

Armonisar las finamiras da la scola populara

Cun il plan d'instrucziun 21 adempleschan ils chantuns la pretensium da la costituziun federala che prescriba che las finamiras da la scola populara vegnian armonisadas tranter ils chantuns ed han vigur per l'entira Svizra. Adressats principals per la consultaziun davart il plan d'instrucziun 21 che cuzza fin la fin da 2013 èn principalmain ils 21 chantuns involvids. Quels resguardan en il rom da l'usitada procedura er ulteriuras organisaziuns ed instituziuns.

Adattaziun dals meds d'instrucziun

Suenter che la consultaziun è terminada vegn il plan d'instrucziun surlavurà, resguardond ils resuns inoltrads. En medem



Il plan d'instrucziun 21 è ina gronda sfida cunzunt er en il Grischun sco sulet chantun triling da la Svizra.

MAD

mument vegnan er ils meds d'instrucziun adattads e novs meds didactics che s'orienteschan al nov plan d'instrucziun elaborads. Sco quai che la scolasta Elita Florin constatescha stettian gia oz a disposiziun meds adattads per pli bleras spartas.

Tenor sias infurmaziuns vegnia il plan d'instrucziun 21 surlavurà probabel sut-tamess l'atun 2014 als directurs d'educaziun da la Svizra tudestga per deci-

siun. Davart l'introducziun sco tala decidia la finala scadin chantun independentamain ed en atgna cumpetenza. Quels decidan medemamain entaifer tge spazi da temp e cun tge mesiras accompagnantas e cumplettaziuns chantunalas il plan d'instrucziun vegn la finala introduci. Las modalitads d'introducziun na sajan perquai betg stadas integradas en la consultaziun.

Infurmaziun e discussiun en il cussegl grond è necessaria

Il chantun Grischun è integrà entirmain en quest project naziunal. Tenor la circulara dal departament d'educaziun dals 28 da zercladur 2013 èn instituziuns u associaziuns che han da frar insatge cun la scola legitimadas da prender posiziun en il rom da questa consultaziun.

Actualmain stettian dentant naginas

directivas politicas u structuralas sco era naginas cundiziuns da rom a disposiziun, di Elita Florin. Damai ch'il plan d'instrucziun tangheschia er ils cuntegns stoppia era vegnir resguardada la situaziun linguistica speziala cun trais linguas uffizialas. La consultaziun dal chantun vegnia realisada sur la regenza.

Damai ch'il plan d'instrucziun è in impurtant project per la scola populara saja impurtant ch'il project reusseschia e che las scolas grischunas profite-schian da quel. Las experientschas fatgas cun «Harmos» na dastgian betg sa repeter. Gist per quel motiv saja impurtant che il parlament grischun posia avair ina infurmaziun detagliada dal project e posia discutir avertamain davart il plan d'instrucziun 21. Quai tant pli ch'ins haja accentuà expressivamain che il chantun sez decidia la finala davart l'introducziun dal plan d'instrucziun 21 e davart las mesiras accompagnantas. Actualmain na saja il cussegl grond betg infurmà tge consequenzas ch'il plan d'instrucziun 21 haja per las scolas grischunas. Quai malgrà che la lescha davart dal cussegl grond stipulescha expressivamain en art. 3 relaziuns anovers: «La regenza infurmescha il cussegl grond permanentamain ed a moda approfondida davart projects da la cooperaziun interchantunala ed internaziunala e davart il stan da las contractivas».

Ina infurmaziun dal cussegl grond saja pia urgenta e necessaria, constatescha deputada Elita Florin. Ins dastga esser spanegià sin la resposta da la regenza.